

有西甌其眾半羸師古曰羸謂劣弱也南面稱王東有閩粵其眾

數千人亦稱王西北有長沙其半蠻夷亦稱王師古曰言長沙

之國半雜蠻夷之人老夫故敢妄竊帝號聊以自娛老夫身定百

邑之地東西南北數千萬里帶甲百萬有餘然北面而

臣事漢何也不敢背先人之故老夫處粵四十九年于

今抱孫焉然夙興夜寐寢不安席食不甘味目不視靡

曼之色耳不聽鐘鼓之音者以不得事漢也今陛下幸

哀憐復故號師古曰復音扶目反通使漢如故老夫死骨不腐改

號不敢為帝矣謹北面因使者獻白璧一雙翠鳥千犀

角十紫貝五百桂蠹一器應劭曰桂樹中蠹蟲也蘇林曰漢舊常以獻陵廟載以赤